



INTRODUCZIUN

DA MARIA CRISTINA DERUNGS-BARTOLOMEI

Jesus mava tras la Galilea perdegond la buna nova de Diu, scatschond demunis e medegond malsauns. Cheu setract'ei d'in leprus. Ussa san ins ch'ina bacteria caschuna la lepra; ei dat persuerter medicaments e virola. Mo per millenis era ella ina sentenza che bandischava alla mort sociala avon che corporala.

Il Veder Testament numna «lepra» (tzara'at) era ina pli leva malsogna della pial; ils pertuccai vegnevan tuttina isolai. Ella lepra vesev'ins la nota dil puccau. Da quella vegn ins perquei buca medegaus, mobein purifcaus: reintegraus ella cuminonza ed el cult a Diu.

Jesus senuspescha buca da tucrar en la «lepra», las mendas dil carstgaun. Renconuschin nus las nunveseivlas «lepras» interiuras che disfigureschan nossa semegliadetgna cun Diu? Selaschein nus tucrar da Jesus, ni tenin nus el lontan da nus? Lein nus daveras viver sco nova creatira? Capin nus la cunzina dil silenzi: q.v.d. che Jesus vul buca esser tschercaus per sias «miraclas», mobein per daventar ina preschientscha viva en nies intern? Igl evangeli ei buca in cudisch da serrar ina gada ch'ins ha «empriu» quel. Tras el secommunichescha a nus il Plaid vivent. Tedlar el ei entupar Jesus. Perquei eis el adina novs ed ei far senn de leger e meditar el adina puspei.

EVANGELI

Mc 1,40–45

⁴⁰In leprus ei vegnius tier el, ha supplicau el en schanuglias e detg: Sche ti vul, sas ti purificar mei.

⁴¹Plein cumpassiun ha Jesus stendiu il maun, tucrau el e detg: Jeu vi, seigies purifcaus! ⁴²Ed immediat ei la lepra tschessada dad el, ed el ei staus purifcaus. ⁴³Jesus ha relaschau el, dend la cunzina: ⁴⁴Mira da dir a negin nuot, mobein va e semuossa al sacerdot e fai per tia purificaziun l'unfrenda prescretta da Moses, per perdetga ad els. ⁴⁵Mo quel ei ius naven ed ha entschiet a raquintar e far paleis la nova, da maniera che Jesus saveva buca entrar pli aviartamein en in marcau, mobein steva ordeifer el solitari. Ed ins vegneva tier el da tuttas varts.